

## Á MESA DO PARLAMENTO GALEGO

O **grupo parlamentario da Alternativa Galega da Esquerda**, por medio da súa deputada **Yolanda Díaz Pérez**, ao abeiro do disposto no artigo 160 do Regulamento da Cámara, presenta a seguinte **proposición non de lei para o seu debate no Pleno**, relativa á Memoria sobre a situación económica e social de Galicia no 2014 aprobada polo Consello Económico e Social de Galicia.

### Exposición de motivos

A aprobación o día 6 de xullo da Memoria sobre a situación económica e social de Galicia por parte do Consello Económico e Social de Galicia pon a énfase na necesidade de ampliar as políticas públicas para contrarrestar as enormes desigualdades que acentou na sociedade galega a aplicación da ortodoxia neoliberal durante a galerna da recesión e da crise.

O amplo repaso que realiza a Memoria amosa varias pautas comúns: fragilidade da recuperación de certas variables básicas da economía, non repercusión desa melloría nas condicións materiais de vida da xente do común, e o atraso comparativo da nosa situación respecto á media estatal.

O leve crecemento galego quedou nun 0.4%, cifra que “(...) *non consegue impulsar a creación de emprego neto, reducíndose a poboación ocupada...*”. Moi significativo neste apartado é o dato de a formación bruta de capital fixo, investimento que crece 1,3% fronte o 3,4% da media estatal.

Outro chanzo clave da dramática regresión das clases traballadoras do país é a constatación que fai a Memoria do desigual reparto das cargas da crise, que levou a que os salarios perderan peso na participación na renda nacional quedando por baixo do excedente bruto de explotación, dos beneficios empresariais. A clase traballadora galega supón polo seu custe laboral a cuarta forza de traballo máis económica do Estado.

O reparto inxusto que fixo o goberno Núñez Feijóo foi de tal magnitude que obriga ao Consello a recomendar que se adiquen máis recursos orzamentarios para as partidas de sanidade, educación, protección e promoción social, outrosí de reclamar que non se deterioren máis as condicións de traballo do persoal do sector público so pretexto de melloras na eficiencia dos servizos públicos.

O informe pon de manifesto as insuficiencias do quefacer público da Xunta en políticas activas de conciliación familiar que contribúan no contexto de crise social a evitar a regresión demográfica galega.

A Xunta de Galicia colaborou na degradación do mercado laboral e así o Consello insta a adopción de medidas que superen a progresiva perda de poboación activa e a preocupante situación da mocidade galega e do colectivo de maiores de 45 anos no paro. Galicia rematou 2014 con menos poboación ocupada tanto a tempo completo como a tempo parcial que no 2013. Refire o informe tamén a necesidade de deseñar políticas que freen as desigualdades e que garantan a cobertura social dunha forza de traballo precarizada. Polarización e crecemento das desigualdades laborais marcan este capítulo adicado ao mercado de traballo.

Non menos severas son as necesidades e urxencias do tecido produtivo galego. O CES recoñece que persisten os atrancos para conquistar financiamento ás empresas e autónomos. Para desgranar urxencias e necesidades dos sectores produtivos, que caso da industria o levan a reclamar con urxencia medidas concretas que entre outras abaraten os prezos enerxéticos ou aumenten os recursos adicados a investigación e innovación, que caeron sen interrupción do 1,04% cando chegou Núñez Feijóo ao 0,86% do 2013. Mención expresa fai o informe da conveniencia de apoiar as políticas de rehabilitación e sustentabilidade enerxética así como a recualificación da man de obra que viñera traballando na construción.

En materia de calidade de vida e benestar social o CES formula tamén toda unha serie de recomendacións que atallen circunstancias tan graves como *“(...)a crecente problemática da pobreza infantil”,* o *“(...) déficit de cobertura por desemprego existente e o forte risco de exclusión social das persoas desempregadas”,* ou a prioridade para adoptar *“(...) todas as medidas necesarias para que as persoas que teñan recoñecido o dereito a unha prestación por estar nunha situación de dependencia accedan á mesma, eliminando así a lista de espera existente.”* Incluso aféalle á Xunta a opacidade e os retrasos en materias tan sensibles como a tramitación e entrega da Risga, ou demanda sen ambaxes a *“creación de centros públicos para a atención a persoas con enfermidades mentais...”*.

Un apartado do informe non deixa de constatar a privación cultural derivada do impacto da crise na nosa sociedade, con mencións expresas a asistencia ao cinema e ás artes escénicas con carácter xeral. Datos derivados da aguda contracción que sufriu o gasto en cultura nos fogares.

Polo sinalado, o grupo parlamentario da AGE formula a seguinte proposición non de lei para o seu debate no Pleno:

- O Parlamento Galego insta á Xunta a que presente un plan de actuación para cumprir o conxunto de consideracións contidas na Memoria do CES 2014.

En Compostela, a 13 de xullo do 2015.

Asdo. Yolanda Díaz Pérez

**Asinado dixitalmente por:**

**Yolanda Díaz Pérez na data 13/07/2015 12:46:37**